



Broj: T18 0 KT 0017029 23
Brčko, 19.05.2025. godine

Optužnica potvrđena: 09.06.2025.godine

Na osnovu člana 35. stav (2) tačka z) i člana 226. stav (1) Zakona o krivičnom postupku Brčko distrikta BiH, p o d i ž e m:

OPTUŽNICU

Protiv:

- 1. IRNISA ZLATIĆA**, zvanog „Grof“, rođen 1991. godine u Brčkom
- 2. MIRELE ZLATIĆ**, rođena 1979. godine u Brčkom,
- 3. MIRALEMA ŠAHMANOVIĆA**, zvanog „Vea“, rođen 1985. godine u Brčkom,

Što su:

Irnis Zlatić sam,

1. tokom 2021. godine u Brčkom, u namjeri sticanja protivpravne imovinske koristi, svjestan da je građanima zabranjeno nuđenje na prodaju i prodaja supstanci koje su propisom proglašene opojnim drogama, što je i htio, suprotno članovima 4. i 19. Zakona o suzbijanju i sprečavanju zloupotrebe opojnih droga, putem instagram profila „Irnis Zlatić“ i „Stan na dan Brčko“, u više navrata sa A. V. dogovorio i vršio prodaju opojne droge „Kokain“, koja je pod tačkom 52. na Listi opojnih droga u Tabeli II Zabranjene tvari i biljke pod strogom kontrolom proglašena psihotropnom tvari, i to u količinama od jednog do tri grama, pri čemu mu je A. za jedan gram opojne droge koju mu je on lično donosio predavao novac u iznosu od 120,00 KM,

dakle, nudio na prodaju i prodavao supstance zakonom propisane opojnom drogom,

2. tokom 2022. godine u Brčkom, u namjeri sticanja protivpravne imovinske koristi, svjestan da je građanima zabranjeno nuđenje na prodaju i prodaja supstanci koje su propisom proglašene opojnim drogama, što je i htio, suprotno članovima 4., 19. i 20.

Zakona o suzbijanju i sprečavanju zloupotrebe opojnih droga, putem mobilnog telefona i društvenih mreža, u više navrata sa A. M., M. M., D. Š. i drugim kupcima, među kojima su D. L., izvijesni B., D. i A., dogovorio i vršio prodaju opojne droge „Cannabis Sativa L“ koja je pod tačkom 13. na Listi opojnih droga u Tabeli I Zabranjene tvari i biljke proglašena opojnom drogom, zatim opojne droge „Amfetamin-Speed“ koja je pod rednim brojem 1. na Listi psihotropnih tvari u Tabeli II Tvari i biljke pod strogom kontrolom proglašen psihotropnom tvari, pri čemu je opojnu drogu lično dostavljao kupcima, pa je tako A. M. u dva navrata lično isporučio po 5 grama opojne droge „Amfetamin-Speed“ i po 2 grama opojne droge „Cannabis Sativa L“, za novčane iznose od po 100,00 KM, dok je M. M. posredstvom A. M. u dva navrata isporučio opojnu drogu „Amfetamin-Speed“ u količinama od po 5 grama, za novčane iznose od po 100,00 KM,

dakle, nudio na prodaju i prodavao supstance zakonom propisane opojnim drogama,

3. dana 24.07.2022. godine u Brčkom, u namjeri sticanja protivpravne imovinske koristi, svjestan da je građanima zabranjeno nabavljanje i nuđenje na prodaju supstanci koje su propisom proglašene opojnim drogama, što je i htio, suprotno članovima 4. i 19. Zakona o suzbijanju i sprečavanju zloupotrebe opojnih droga, od njemu poznatih lica prvo nabavio opojnu drogu „Cannabis Sativa L“ koja je pod tačkom 13. na Listi opojnih droga u Tabeli I Zabranjene tvari i biljke proglašena opojnom drogom, pa je zatim u količini od 1,524 grama, posredstvom lica kodnog naziva „Sajgon“ i lica kodnog naziva „Munja“, dao prikrivenim istražiteljima Državne agencije za istrage i zaštitu, Ministarstva bezbjednosti BiH, kodnih naziva „Nole“ i „Sano“, kako bi oni isprobali kvalitet supstance i sa njim uspostavili dalju saradnju u prometu opojnim drogama,

dakle, nudio na prodaju supstancu zakonom propisanu opojnom drogom,

4. Od kraja januara 2023. godine pa sve do 28. jula 2023. godine u Brčkom, u namjeri sticanja protivpravne imovinske koristi, svjestan da je građanima zabranjeno nuđenje na prodaju i prodaja supstanci koje su propisom proglašene opojnim drogama, što je i htio, nudio na prodaju i prodavao opojnu drogu „Cannabis Sativa L“, koja je pod tačkom 13. na Listi opojnih droga u Tabeli I Zabranjene tvari i biljke proglašena opojnom drogom, a čiji promet i držanje su zabranjeni članovima 4. i 19. Zakona o suzbijanju i sprečavanju zloupotrebe opojnih droga, na način što je sa M. H. i A. K. prvo dogovarao prodaju opojne droge, a zatim je njima i prodavao u količinama od 20 do 40 grama, tako što bi oni došli u njegovo dvorište, preuzeli opojnu drogu i dali mu za nju novac, kao i sa E. T. i M. M. zvanim „...“, koji su takođe dolazili kod njega kući, preuzimali opojnu drogu u količinama od 10, 20 i 50 grama, pri čemu su mu za 10 grama opojne droge davali novac u visini od 140 KM, za 20 grama opojne droge davali novac u visini od 260 KM, a za 50 grama opojne droge davali novac u visini od 450 KM,

dakle, nudio na prodaju i prodavao supstance propisom proglašene opojnim drogama,

Irnis Zlatić, Mirela Zlatić i Miralem Šahmanović

5. Od početka mjeseca juna 2023. godine, u Brčkom, u namjeri sticanja protivpravne imovinske koristi, zajedno i po prethodnom dogovoru, svjesni da je građanima zabranjeno držanje radi prodaje, prenos i prodaja supstanci koje su propisom proglašene opojnim drogama, što su i htjeli, u dvorištu kuće Miralemove majke, u ulici F. F. V. broj ..., Miralem Šahmanović je držao opojnu drogu „Cannabis Sativa L“, koja je pod tačkom 13. na Listi opojnih droga u Tabeli I Zabranjene tvari i biljke proglašena opojnom drogom, a čiji promet i držanje su zabranjeni članovima 4. i 19. Zakona o suzbijanju i sprečavanju zloupotrebe opojnih droga, dok je Mirela Zlatić u dogovoru sa Irnisom Zlatićem vršila prevoz opojne droge do lica kodnog naziva „Ključ“ kako bi je on otkupio, pa je tako dana 09. juna 2023. godine, Mirela Zlatić po nalogu Irnisa Zlatića trotinetom izvršila prevoz jednog PVC pakovanja opojne droge „Cannabis Sativa L“, bruto mase 300,00 grama, od kuće Miralemove majke do Irnisove kuće u ulici Mujkići II broj 15, u kojoj se nalazio Irnis sa licem kodnog naziva „Ključ“, da bi nakon toga Irnis licu kodnog naziva „Ključ“ predao PVC paket sa opojnom drogom, a on njemu novac u visini od 1.800,00 KM, nakon čega je lice kodnog naziva „Ključ“ predmetnu opojnu drogu predalo policijskim službenicima Policije Brčko distrikta BiH,

dakle, kao saizvršioci, držali radi prodaje, prevozili i prodavali supstance propisom proglašene opojnim drogama,

6. Od sredine mjeseca juna 2023. godine, u Brčkom, u namjeri sticanja protivpravne imovinske koristi, zajedno i po prethodnom dogovoru, svjesni da je građanima zabranjena prodaja, prenos i posredovanje u prodaji supstanci propisom proglašenih opojnim drogama, što su i htjeli, u dvorištu kuće Miralemove majke, u ulici F. F. V. broj ..., Miralem Šahmanović je držao opojnu drogu „Cannabis Sativa L“, koja je pod tačkom 13. na Listi opojnih droga u Tabeli I Zabranjene tvari i biljke proglašena opojnom drogom, a čiji promet i držanje su zabranjeni članovima 4. i 19. Zakona o suzbijanju i sprečavanju zloupotrebe opojnih droga, dok je Mirela Zlatić u dogovoru sa Irnisom Zlatićem vršila prevoz opojne droge do lica kodnog naziva „Ključ“ kako bi je on otkupio, pa je tako dana 28. jula 2023. godine, Mirela Zlatić po nalogu Irnisa Zlatića trotinetom izvršila prevoz jednog PVC pakovanja opojne droge „Cannabis Sativa L“, bruto mase 520 grama, od kuće Miralemove majke do Irnisove kuće u ulici Mujkići II broj 15, u kojoj se nalazio Irnis sa licem kodnog naziva „Ključ“, da bi nakon toga Irnis licu kodnog naziva „Ključ“ predao PVC paket sa opojnom drogom, a on njemu novac u visini od 4.500,00 KM, nakon čega je lice kodnog naziva „Ključ“ predmetnu opojnu drogu predalo policijskim službenicima Policije Brčko distrikta BiH,

dakle, kao saizvršioci, držali radi prodaje, prevozili i prodavali supstance propisom proglašene opojnim drogama,

Miralem Šahmanović sam,

7. Dana 28. jula 2023. godine, u Brčkom, u ulici F. F. V. broj ..., Brčko distrikt BiH, u unutrašnjosti kuće koja je vlasništvo njegove majke B., u namjeri sticanja protivpravne imovinske koristi, svjestan da je građanima zabranjeno držanje radi prodaje supstance propisom proglašene opojnim drogama, što je i htio, opojnu drogu „Cannabis Sativa L“, koja je pod tačkom 13. na Listi opojnih droga u Tabeli I Zabranjene tvari i biljke proglašena opojnom drogom, a čiji promet i držanje su zabranjeni članovima 4. i 19. Zakona o suzbijanju i sprečavanju zloupotrebe opojnih droga, skrivao u više PVC paketa ukupne bruto mase 512,537 grama, a što je sve pronađeno prilikom realizacije Naredbe Osnovnog suda Brčko distrikta BiH u pretresu izvršenom od strane policijskih službenika Policije Brčko distrikta BiH,

dakle, držao radi prodaje supstance propisom proglašene opojnim drogama,

čime su učinili:

Irnis Zlatić radnjama opisanim pod tačkama 1., 2., 3. i 4.: produženo krivično djelo – Neovlaštena proizvodnja i stavljanje u promet opojnih droga – iz člana 232. stav (1) Krivičnog zakona Brčko distrikta BiH u vezi sa članom 55. istog Zakona;

Irnis Zlatić, Mirela Zlatić i Miralem Šahmanović, kao saizvršioci, radnjama opisanim pod tačkama 5. i 6.: produženo krivično djelo – Neovlaštena proizvodnja i stavljanje u promet opojnih droga – iz člana 232. stav (1) Krivičnog zakona Brčko distrikta BiH, a sve u vezi sa članovima 31. i 55. istog Zakona;

Miralem Šahmanović radnjama opisanim pod tačkom 7.: produženo krivično djelo – Neovlaštena proizvodnja i stavljanje u promet opojnih droga – iz člana 232. stav (1) Krivičnog zakona Brčko distrikta BiH u vezi sa članom 55. istog Zakona.

Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.
